

cerum Academicorum examine totus Amplissimus Senatus ratum esse voluit. Nihil ergo restat, præstantissime Domine Canditate, quam ut mecum in amoena *Musarum* & *Apollinis* vireta divertas & pro conficienda Laurea corona Medica mox tibi imponenda, flores varios huic intentioni fervientes decerpas, non solū ornatus gratia, sed ut fragrantia sua per totā vitam ceu signa quædam gētilitia, hieroglyphica quadam declaratione te officii tui cōmonefaciant.

Quod autem in communi proverbio dicitur, à maxima parte denominationem fieri, nos adhortatur, ut à *Lauro* faciamus initium. Nosti *Laurum* arborem exoticam esse non indigenam, quam ob causam cum adjectione frequenter *Alexandrina* dicitur: Sic etiam tibi quicquid in te *Lauream Medicam* promeruit, aliunde venisse statuas, à *DEO* videlicet *ter opt. max.* omnis bonitatis autore, qui præceptoribus tuis mediantibus τὸ γνωστικὸν intellectus illustrare voluit: tuum erit erga *DEUM* pie vivendo, erga præceptores, grata observantia, quod in te collatum est, prædicando hoc ipsum agnoscere. Si *Lauri* qualitates cōsideras, insignis amarities sese offert, quæ tamen nō obstat, quò minus utiliter variis affectibus pro conservatione sanitatis inservire possit. Ita te quoq;, qui *Lauream Medicam* promeruisti labor & molestia rerum inquirendarum & perferendarum minimè deterreat: Sicut enim à juvantibus *Lauri* qualitatibus amarities abesse non potest, ita in posterum *Laureæ Medicæ* finem, nominis videlicet celebritatem, ex gravissimorum morborum cognitione & curatione comparatam, sine molestiis atque laboribus non consequeris. *Laurus* inter alia partum difficilem accelerare dicitur: sic tibi quoque promerita *Lauri* in posterum difficulter non accidet, ea quæ studiis & laboribus Herculeis, hætenus tibi comparare voluisti, & gestatione temporis diuturni, mar